



PUO EA

MOHLOMPHEHI TONA-KHOLO, DR. MOEKETSI

MAJORO

KA BOEMO BA KOKOANA-HLOKO EA COVID19

KAHARE HO NAHA EA LESOTHO

KA LA 21 TLHAKUBELE, 2021

Motlotlehi Letsie III;

Mookameli oa Ntlo ea Mahosana;

Motsamaisi oa lipuisano ka Ntlong ea Bakhethoa,

Moahloli e Moholo;

Mookameli oa Lekhotla la Maipiletso;

Mohlomphehi Motlatsi oa Tonakholo;

Litho tsa lekhotla la matona;

Sechaba sa heso sa Basotho

Selelekela

Kea le lumelisa Basotho ba heso mantsibueng a kajeno. Ke hlaha kapele ho lona kamor'a libeke tse tharo naha ea rona e theohetse 'maleng o pherese tlasa morero oa rona oa taolo ea kokoana hloko ea Covid 19.

Ha ke qetela ho bua le lona ka la 28 Hlakola monongoaha, sekhahla sa tšoaetso ea kokoana-hloko ena se ne se eme ho linoko tse supileng 7 lekholong. Ke ile ka le bolella hore e ka khona hore re oele ka tlase ho linoko tse hlano lekholong hore naha e be taolong ea seoa sena.

Boemo ba tšoaetso ea Covid 19

Sechaba sa heso, ka nako e fetileng re ile ra lumellana ka semetho sa tšoaetso se neng se ipapisitse le ntho eo re e bitsang sekala sa tšoaetso (Reproduction Rate, R_0 kapa R_t). Litsibi li re boleletse hore semetho seo sa rona se feletsoe ke nako ka lebaka la ho fetoha hoa mokhoa oa tšoaetso koano Lesotho. Ka nako e fetileng, tšoaetso ea rona boholo e ne e tla le **baeti ba tsoang Aforeka Boroa**. **Empa kajeno tšoaetso e runya ka har'a Sechaba**, 'me mokhoa ona oa semetho o feletsoe ke nako.

Ka keletso ea Litsibi tsa rona, **semetho** seo re khethang 'mala oa mokhino se se se kenyeletsa lintlha tse tharo eleng **sekhahla sa tšoaetso, bokhoni ba naha ho alafa bakuli, le lintlha tse ling tsa bohlokoa**. Mohlomphehi Letona la Bophelo le Liofisiri tsa Nacosec ba tla le manollela litaba tsena ka botlalo. Hoa ka ke feela ho li otlala lihlohong.

Semetho sena se secha seo Lekhotla la Matona le se ananetseng hoseng hoa kajeno, se re beha 'maleng o **moputsoa, 'me ke phatlalatsa hore ka khitla bosiuong ba kajeno Naha ea Lesotho e tla theohela 'maleng o moputsoa ho tloha ho o phereses.**

Leha ho le joalo re tobane liqholotso tse tharo tse supang hore re tlameha re lule itlhokometse ka nako tsohle, eleng (a) phomolo ea Paseka eo re lebeletseng hore ho ka ba le phallo e kholo ea baeti, (b) ho kena hoa mariha; le (c) leqhubu la boraro la Covid 19. Litšoaetsano tsena tse qhommeng seterekeng sa Leribe matsatsing ana lia nyarosa, 'me li bontša hore likarolo tse ling tsa Sechaba li ntse li so ikamahanye le lipehelo tsa Covid 19. Sena se bolela hore re lule re le hlokolosi.

Lekhotla la matona, ka boelets'i ba NACOSEC, le fihletse tse liqeto tse amanang le 'mala ona o moputsoa, 'me ke tla qotsa feela tse fokolang:

- Lipapali tseo libapali li khonang ho bapala li kentse limonkoana, 'me tseo ho tsona ho sa thetsanoeng, li lumeletsoe. Lipapali tseo ho thetsanoang ebile ho le thata ho kenya limonkoana, li tla lumelloa ha fela ho bapaloa ka ho fumana tokomane ea tumello ho tsoa Sepoleseng.
- Libini le liqaboli li lumelletsoe ho tsoela-pele ho rekisa lihlahisoa le `mino oa tsona, le ho ka etsa mekete ka ho fumana tumello e tsoang Lekaleng la Bohahlauli le Sepoleseng. **Monga mokete le monga sebaka ba tla nka boikarabello ba hore lipehelo li ea lateloa.**
- Matlo a kamohelo ea baeti a buletsoe ka botlalo ho ipapisoe le lipehelo tsa bophelo.
- Matlo a thekiso ea lijo a tla tsoela-pele ho amohela bareki ka linoko tse 50 bakeng sa bareki ba lulang. Tsona li tla bula ho tloha ka hora ea botšelela hoseng hoisa horeng ea borobong bosiu.

- Matlo a thekiso ea mothamahane a lumelletsoe ho rekisa lino ho se bareki ba lulang, `me phetoho e teng ke eahore likhoebo tsena li se li tla buloa ho tloha `mantaha ho isa labohlano ho tloha ka hora ea borobeli hoseng ho isa ka hora ea borobeli mantsiboea.
- Bo Ramakoloi a baeti ba lumelletsoe ho palamisa lenane le felletseng la makoloi a bona empa ho sebe le baeti ba emang ka maoto makoloing ohle a baeti. Haho baeti ba lumelletsoeng hoja kahare ho makoloi. Baeti ba nyanyatsoe ha ba kena kahare ho makoloi a joalo le hore ba kenye limonkoana ka nako eohle.
- Libaka tseo ho tsona ho bechoang lipapali li lumelletsoe empa ka lipehelo.

Tse ling li se li tla manolloa ke Matona li liofisiri.

Tšehetso ea Likhoebo

‘Muso o ntse o tsoela pela ho nanabetsa letsoho likhoebong tsa Basotho, ‘me kajeno ke motloho ho tlaleha hore ke likhoebo tse kholo tse fetang sekete (M9 million) le tse fetang likete tse supileng (M4 million).

Lithuso tsa 'Muso le theko le phano ea Lijo

Leanong la 'Muso la ho reka lijo tsa Basotho le ho li fitisetsa sechabeng se hlokang, 'Muso o se fane ka lijo malapeng a 20,300, 'me o ntse o tlo tsoela pele tšebetsong ena. Li-tonne tse 371 tsa poone le tse 128 tonnes tsa linaoa li se li rekuoe ho Basotho. Ho sa le joalo 'Muso o ekelitse lenane la likhutsana tse fumanang lithuso 'musong ho ea ho likete tse supileng, ka M756 khutsana ka 'ngoe ka khoeli.

'Muso o ntse o ntšetsa pele lithuso tsa maqheku le maqhekoana a lilemo tse 60-69. Ho se ho lefuoe malapa a fetang **likete tse mashome a mararo le motso o le mong** (31,000), 'me ngoliso e ntse tsoela pele ele hape ho lokisetsa mohlang 'Muso o khonang ho atametsa lipenshene ho maqheku ana.

Theko ea ente ea Covid 19

'Muso o ntse o sebetsa ka matla-matla ho fumana liente tsa Covid 19, 'me ke motlotlo ho tlaleha hore Basotho ba fetang likete tse leshome le makholo a mararo be se fumane li-ente, 'me tšebetso e ntse e tsoela pele. Bekeng e tsoa feta ke ile ka khakola letlole la Likhoebo tse ikemetseng le reretsoeng ho tlatsetsa letšolong lena la 'muso la ho fumanela Basotho liente. 'Muso o tsoile letšolo ho fumana liente

hohle moo li ka fumanehang teng. Re boetse re ntse re thehile tsebe ho utloa hore naa tsa liente tsa COVAX le AU li tla fihla neng mona Lesotho.

Ke lakatsa ho qetella ka ho tiisetsa Sechaba sa Basotho hore 'Muso o se o phethetse moralo oa naha oa ho itokisetsa phomolo ea Paseka. Moralo ona o kenyeletsa boipiletso ba 'Muso hore bohle ba ka khonang ho qoba ho tla hae ba etse joalo. Ke boele ke toboketse hore lenaneng la liente leo re le batlileng re kenyelelitse Basotho ba lulang Aforeka Boroa. Molemong oa Basotho bohle ba tla iphumana ba tlameha ho tla hae, 'Muso o se o le Malala-a-laotsoe ho etsa litlhahlobo ho motho e mong le e mong ea tšelelang ka koano, le hore ba nang le tšoaetso ba hle ba ee kalafong hang hang. Matona a heso a tla manolla litaba tsena ka botebo boesa.

Today, Cabinet reviewed the current Risk Determination and Mitigation Framework and adopted a new framework that considers several factors at the same time including epidemiological status, health care system readiness for increased infections, and forward-looking environmental factors. This framework is more attuned to the community transmission that the country now faces and dispenses with the reproduction rate that was more tailored to travel-based infections.

Based on this framework, the country now moves into colour blue effective midnight tonight. However, the upcoming easter holidays and winter as well as a possible third wave that might take root in Africa instructs caution.

Kea leboha Sechaba sa heso; ha re tsoeleng pele ho ipaballa le ho rapela Molimo hore sireletsa lefung lena le khopo. Ke takatso ea 'Muso hore lintho li khutlele setloaeling, empa sena se tla etsahala feela ka tlamahano le lona Sechaba sa heso.

Khotso!

Pula!

Nala!